

**Historia membri virilis feliciter extirpati : commentatio chirurgica /
auctore Carolo Augusto Kuhl.**

Contributors

Kuhl, Carl August, 1774-1840.
Royal College of Surgeons of England

Publication/Creation

Lipsiae : Apud Carolum Franciscum Köhlerum, 1824.

Persistent URL

<https://wellcomecollection.org/works/hsswnev6>

Provider

Royal College of Surgeons

License and attribution

This material has been provided by This material has been provided by The Royal College of Surgeons of England. The original may be consulted at The Royal College of Surgeons of England. where the originals may be consulted. This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

HISTORIA

MEMBRI VIRILIS

FELICITER EXSTIRPATI.

COMMENTATIO CHIRURGICA

AUCTORE

CAROLO AVGVSTO KVHL

PHILOS. ET MEDIC. DOCTORE, CHIRURGIAE IN VNIVERSITATE LITERARVM

LIPSIENSI PROFESSORE PVBLICO ORDINARIO.

CVM TABVLA AENEA.

LIPSIAE

APVD CAROLVM FRANCISCVM KÖHLERVM.

MDCCXXIV.

Digitized by the Internet Archive
in 2016

<https://archive.org/details/b22372702>

Quotiescunque instrumentorum chirurgicorum a maioribus nostris
aeque ac a coaeuis inuentorum atque saepe plus quam iustis laudi-
bus celebratorum vllam egregiam adspicio collectionem, toties eo-
rum copiam tacitus quidem admiror, ingeniique humani agnosco so-
lertiam, sed mihi temperare nequeo, quin plurima eorum non tam
ad restituendam hominum salutem, quam potius ad parandam in-
ventoribus gloriam aliquam inuenta esse credam. In memoriam
solummodo reuocemus immensam ad feliciter perficiendam suffusio-
nis operationem inuentorum, perinde ac instrumentorum, quibus
ad calculum secandum vti possumus, supellectilem; nonne plura eo-
rum vix ac ne vix quidem inter sese differunt, nonne in eum modo
finem excogitata esse videntur, vt postquam vni tantum operationi
inseruierant, inque aliquo diario chirurgico, aut in dissertatione
inaugurali descripta et commendata fuerant, aeternae tradantur
obliuioni? Quod autem instrumenta inueniendi studium quo magis
vanitatem ridiculam prodere videtur, eo magis illos laudare soleo,
qui apparatus chirurgicum minuere et paucissimorum instrumento-
rum ope vel grauissimas operationes perficere student. Cuius rei
probandae causa nonnisi ad CÖOPERVM et LANGENBECKIVM prouoco,
qui vel in summa instrumentorum abundantia vnus scalpelli mini-
sterio in lithotomia exercenda contenti sunt. Eodem modo REISIN-
GERVS pupillae artificialis conformationem maxime complicatam

ceratotomi et hamuli duplicis auxilio absoluit. Confiteor quidem, me ipsum quoque antea illis fuisse addictum, qui in operationibus peragendis ingenti apparatu chirurgico delectantur: ex quo vero BARTHII ophthalmiatri Vindobonensis, praeceptoris immortalis admonitionem plus vna vice repetitam audiui: „*Ne veniat vobis, auditores, instrumentorum inveniendorum diræ cupido, sed si vobis de infelici operationis exitu lugendum est, minime instrumentorum iniquitatem, sed potius alias res, maxime vestram imperitiam, et omnino humanae naturae imbecillitatem accusandam esse existimetis,*“ hoc errore abiecto in contrariam opinionem ductus, simplicitatem summam in encheiresibus chirurgicis non satis celebrandam esse puto. Cuius axiomatis veritatem cum optime perspexissem, in commentatione nuperrime edita acuum aneurysmatum ligationi dicatarum magnum quidem, ne eas penitus ignorasse viderer, numerum exposui, sed meam simul hac de re mentem aperui, scilicet quo simplicius sit eiusmodi instrumentum, eo facilius meliusque perfici operationem, nec non duarum operationum simpliciiori methodo feliciter peractarum addidi historias. In hac prolusione aliam, eamque non minoris momenti, exstirpationis membri virilis in nostro nosodochio septem abhinc annis peractae narrationem cum lectoribus communicare apud animum constitui meum, non quod eiusmodi operationem pro inaudita habeam, sed potius, ut vel in grauissimis, maximeque periculosis encheiresibus simplicem agendi rationem locum habere posse probem.

Nolo nunc in verbosam huius operationis explicationem exspatiari, sed ad THAVTH^{a)} libellum ex meo iudicio praeclarum lectores ablegandos censeo.

Duo symptomata quae multas operationes chirurgicas inprimis difficiles terribilesque reddunt, sanguinis profusio nimia, et nervorum perturbatio, ea quoque ab exstirpatione membri virilis suscipienda chirurgos veteres ad CORN. CELSI vsque tempora retinuisse

a) *Abh. über d. ges. u. kr. Zust. des m. Gl. Wien, 1814.*

minime mirandum est. Sunt quidem, qui HIPPOCRATEM iam scirrho ac carcinomati huius partis vel cauterium vel scalpellum adhibuisse existiment, quorum vero opinionem incertam ac vanam esse, negare non possumus. Multo magis CELSO ^{a)} primam eamque claram huius encheireseos descriptionem debemus, qui, „*si cancer colem occupavit, adurentia inspergit, maxime id, quod ex calce, chalcitide, auripigmento componitur. Si medicamenta vincuntur, scalpello, quidquid corruptum est, sic ut aliquid etiam integri abeat, praecidi, vulnus deinde vri iubet, sed maxime metuit, ne profusio sanguinis insequatur, in quo casu quietem longam, aquam frigidam, medicamina styptica, et ferrum candens commendat.*“

Recentiores chirurgi in hac operatione exercenda in duas partes abiere, quarum vna scalpellum, altera vero ligationem defendit: Ex illis BELLIVM ^{b)}, DESAVLTIVM ^{c)}, DZONDIVM ^{d)}, LANGENBECKIVM ^{e)}, LODERVUM ^{f)}, PEARSONIVM ^{g)}, RICHTERVUM ^{h)}, SCHMALZIVM ⁱ⁾, SCHREGERVM ^{k)}, ex his autem HEISTERVM ^{l)}, PALVCCIVM ^{m)}, PLENKIVM, RVYSCHIVM ⁿ⁾, SABATIERVM ^{o)}, inter nostri aevi chirurgos GRAEFIVM ILL. appello, cuius agendi rationem BIENERVS ^{p)} in dissertatione academica Lipsiae defensa expositam iconibus illustrare studuit, et tria exempla laetum huius operationis exitum testantia adiecit.

Ceteroquin omnes virgae exstirpationem vel hoc vel illo modo peragentes in eo consentiunt, quo propius ad symphysin ossium pubis demenda sit haec corporis masculi pars, eo maiorem esse haemorrhagiae funestae timorem, quapropter modo hoc, modo illud iacturae sanguinis aut auertendae aut coercendae remedium proposuerunt. Inter scalpelli defensores ILL. SCHREGERVS amputationem

a) de med. L. VI. sect. XVIII. §. 3. b) *Lehrb. d. Wundarznt.* I. 413. c) *chir. Wahrnehm.* 3. B. d) *Beitr. z. Vervollk. der Heilk.* I. Th. e) *Neue Bibl.* I. 4. f) *chir. Beob.* I. 79. g) *Samml. aus. Abh.* XVI. 650. h) *diss. de opt. membr. viril. amput. meth.* Regiom. 1804. i) *Loder Journ.* I. 4. k) *chir. Vers.* I. l) *Instit. chir.* m) *Neue Anm. über d. Absetz. d. m. R.* Lpz. 1752. n) *Observ.* XXX. o) *médic. op.* II. 303. p) de exstirp. penis per ligat. Lips. 1816.

repetitis incisionibus perficiendam commendat, quarum vna absoluta arteriae ligantur, ne fortasse haemorrhagia sequentem impediatur: quam membri virilis exstirpandi methodum EXC. DZONDIVS quoque amplexus et cum felici euentu executus est; nihilominus tamen nec SCHREGERVS, nec DZONDIVS hanc mentulae remotionem valde periculosam esse negat. Quam ob causam mihi vitio non vertendum videtur, cum historiam morbi aequae ac sanationis huc pertinentem cum lectoribus communicem.

Mercenarius egenus, H. inprimis e parietibus ex luto conficiendis victum sibi quaerens, annum quinquagesimum quartum agens, haud robustae constitutionis, vlcere carcinomatico, montem Veneris, membrum virile, et partem anteriorem superioremque scroti occupante laborans, sub finem anni MDCCCXVII. in nosocomium nostrum receptus est. Hic vir nulla vnquam aegritudine, si morbos infantiles, ac scabiem paupertatis iniuria genitam exceperis, affectus, malique venerei plane experts, tribus abhinc annis partem palae superiorem fortuito casu membro virili illiserat, ex quo ictu ab initio parum doloris percepit. Septimanis vero aliquot praeterlapsis tuberculum quoddam in praeputio natum hunc virum impulit, vt ex rustici cuiusdam consilio tumorem vnguibus saepe scalperet, lotioque lauaret. Quod cum sine fructu factum esset, a chirurgo inferioris conditionis auxilium petiit. Hic eiusmodi malum non raro occurrere, *mitram hispanicam* (!) appellari, nec multum exinde metuendum esse affirmavit: interea nostro medicamentum quoddam externum praebuit, quo per satis longum tempus adhibito accessit dolor lancinans, et tumor ichorosum fluidum male olens effundere coepit, ita vt aegrotus ad alium chirurgum confugeret, qui per septem menses tertio quoque die causticum lunare loco affecto applicuit, et aquam saturninam commendauit. Morbus autem tantum abfuit, vt mitesceret, vt de die in diem peior redderetur. Postea aegrotus textori linteorum cuidam, qui horis subsecivis artem salutarem exercet, se tradidit, a quo monitus est, vt cataplasmata ex farina secalina parata imponeret, quae tam efficacia fue-

runt, vt post breue tempus vndeuginti conspicerentur orificia, ex quibus lotium proflueret. Cum dolorum vehementia, tum immunditiei molestia miserum adegerunt, vt textore relicto ad chirurgum alium se conferret, a quo epithemata aromatica accepit, vna cum spe celerrimae restitutionis: sed omnia frustra sunt adhibita. Ita crudeliter vexatus, omnique spe salutis recuperandae destitutus aegrotus b. ROSENMVELLERVM adiit, ipsumque enixissime rogauit, vt, si quod arti superesset remedium, id sibi praeberetur, hic miserum SENATVI LIPSIENSI AMPLISSIMO, cuius non minor in miseris subleuandis est beneficentia, quam in regenda ciuitate sapientia, commendauit, hocque modo effecit, vt ille in nosodochium ciuicum reciperetur.

Conditio aegroti maxime deploranda fuit: corporis vniuersus habitus summam debilitatem monstrauit, oculi languidi, palpebra superior laxa et pendula, genae collapsae et pallidae, labia exsanguia et trementia, aegrotus stare vix valuit, respiratio difficilis ac anhelosa, pulsus debilis ac iusto frequentior, somnus dolore graui et pertinaci lumborum dorsique, febre vespertina et sudore matutino viscido interruptus, appetitus exiguus, digestio impedita, aluus modo laxa, modo obstructa fuit. Tumor commemoratus adspectum prae-buit tristissimum, totum membrum virile ad symphysin vsque ossium pubis in globum, pugni magnitudine, transmutatum erat, qui ex minoribus globulis, epidermide et cute destitutis, et excrescentiarum brassicae botrytidis figuram referentibus erat compositus, ita, vt vbi praeputium, vel corpora cauernosa, vel glans, vel denique vrethrae orificium fuissent, vix cognosceres, margines duri, eschara nigra, duraque passim obducti et vel a leui attactu sanguinem fundentes, superficies ichore impuro, limpido, maxime foedente, cum vrina mixto maduit, in vlceris vicinia vbique foraminula lotium excernentia conspecta sunt, vt de fistulis vrinariis dubitare non posses, quarum ostiis specillum immissum ad vrethram vsque produci potuit: parietes harum fistularum duri fuerunt, atque callosi, lotii stillicidium inuito et inscio aegroto perpetuum; dolores pungentes antea

commemorati modo remiserunt, modo fortius redierunt. Mons Veneris excrescentias illis iam descriptis similes obtulit, pars anterior, atque superior scroti ab ichore et vrina largiter profluente epidermide denudata fuit, quod quoque in femoribus animaduertendum erat. Venae proximae varicosae fuerunt, haemorrhagia ex tuberculis quotidie fere apparuit; glandulae inguinales sympathice tumebant, in perinaeo vlcera foetida inuenta sunt. Ad hanc malorum turbam tres herniae abdominales, in dextro latere inguinalis et cruralis, in sinistro vero cruralis accesserant, quae aegroti conditionem multo magis miseram reddebant. Interea valde mirandum erat, ceteras partes generationi dicatas, vti testiculos, epididymides, funiculosque spermaticos perinde ac glandulam prostatam nihil morborum monstrasse.

Quae cum ita essent, minime dubius de carcinomatosa huius mali indole, in consilium vocavi CLARVM, WENDLERVM et KOHLRSCHIVM, qui viri EXC. et EXP. in hoc misero vires praeprimis vitales, quantum fieri posset, erigendas, febremque hecticam coercendam, postea autem totius tumoris exstirpationem quam primum suscipiendam esse mecum statuerunt. Quocirca corticem Peruvianum cum lichene Islandico pro vsu interno, tenuissimam vero mercurii sublimati corrosiui solutionem pro vsu externo, qua tumor quotidie ter vel quater foueretur, et lintei carpti auxilio tegetur, praescripsimus. Cum aegrotus ab operatione valde abhorreret, haec medicamenta cum interna, tum externa per longum tempus, mutatis interdum mutandis, continuabantur, victusque lautior praebebatur, quo demum factum est, vt vniuersa hominis valetudo paulo melior euaderet.

Quo minus interea malum primarium curandi ratione imminuebatur, eo acrius hortati sumus aegrotum, vt sese operationi sub prognosi quidem dubia, neque tamen sine quadam restitutionis spe subiiceret. Sed, aegroti voluntas nutabat per aliquot septimanas, donec circa finem mensis Aprilis MDCCCXVIII. se operationem toleraturum esse, subito declararet, quae die XXVII Apr. multis

adstantibus medicis, artisque cultoribus peracta est. Viro supino collocato, pedibus flexis, et in sellis subpositis firmatis, cathetere argenteo in vrethram et vesicam vrinariam caute quidem, sed non sine molestia propter orificii occultationem inducto, tumore inuoluto et protracto, integumentisque montis Veneris communibus in utroque latere retractis, duas incisiones semilunares a margine symphyseos ossium pubis incipientes, et ad tertiam usque partem anteriorem ac superiorem scroti procedentes scalpelli ministerio institui, quarum cornua, ubi inuicem coibant, in superiore et inferiore parte angulos formabant. His plagis inuolucra communia corrupta separabantur: plures exiguae arteriae discissae sanguinemque spargentes KOHL-RVSCHII dexteritate comprimebantur. Margines huius insulae carneaе, (liceat mihi formula loquendi haud consueta vti) hamulo BROM-FIELDIANO attracti prouido scalpelli ductu a partibus subiacentibus soluebantur, donec omnes carcinomate affectae partes essent remotae, et ossa pubis non nisi periosteo tecta conspicerentur. Omnes spectatores aegroti patientiam et sanguinis effluentis exiguam copiam mirati sunt; quamuis magna arteriarum minutarum copia discinderetur, quarum plurimae compressae, nonnullae autem filis sericeis cera obductis ligatae sunt. Deligatio vulneris fuit simplicissima, linteam carptum et linteamina compressa vulnere imposita fasciae, quae figuram literae latinae T habet, ope firmabantur, deinde catheter argenteus extractus, elasticus vero inductus et in vesica relictus est. Aegrotus deinde maxime debilitatus in lectum translatus, ipsique maxima tam corporis, quam animi tranquillitas commendata est.

Vesperī eiusdem diei, dolor vehemens, lotii profluvium semipiternum, sudorque profusus aegrotum quiescere haud patiuntur, pulvis DOVERI exhibitus est.

Altero die nulla conditionis mutatio.

Per plures dies aegrotus de summa debilitate, appetitus, somnique defectu conquestus est: omnia symptomata febrem traumaticam adesse significarunt.

Quinto die, deligatione prima soluta, aspectus vulneris malus, superficies ita impura, saniosa, et pallida fuit, ut ad medicamentorum balsamicorum leniter irritantium cum internorum tum externorum usum confugiendum esset; quo factum est, ut suppuratio, ac habitus aegroti uniuersus proximis diebus melior, vulnusque purius redderetur.

Die decimo vincula arteriarum ex vulnere prodibant, puris conditio bona, vulneris ambitus minutus, aegrotus nil nisi molestiam, instrumento ipsi paratam habuit, de qua lamentaretur.

Per aliquot dierum spatium aegrotus peius se habuit, partim propter ciborum noxiorum clam ipsi allatorum usum, partim propter animi commotionem. Ob symptomata gastrica remedium leniter purgans adhibuimus.

Die decimo quinto, cathetere elastico emollito abiecto, recens est immissus.

Die vigesimo aegrotus hilarior fuit, nulla functio corporis a norma aberrauit, vulnus repente est minutum, cicatricis in ambitu initia animaduersa sunt: papillae carnae laete rubentes optimam prae se tulerunt formam.

Nolo nunc narratione nimis extensa defatigare patientiam lectorum, sed propero ad finem historiae. Conditio aegroti quouis die facta melior, suppuratioque minuta est, cicatrix versus vulneris centrum processit, in scroti parte anteriore et superiore rugae sensim sensimque formatae sunt, vires creuerunt, vir lotium retinere coepit. Cicatrice perfecta cannulam ipsi praebuimus, cuius ministerio mingeret, qua vero per breue tantum tempus usus est, nam post aliquot menses eam abiecit, lotii cum emissionem, tum retentionem, voluntatis imperio hucusque obtemperante, nec villo amplius impedimento turbata.

Die XIII. Iunii hic vir nosocomio gratissimus lactissimusque valedixit, et hodie quoque optima gaudet valetudine, et laborum

molestias vti in virili aetate tolerat. Ad hanc sanitatem augendam, viresque conseruandas non parum conferre mihi videtur seminis resorptio: repetitis enim vicibus vir confessus est se ante morbum et sub morbi adeo initio saepissime, morbo autem superato ne semel quidem eiectionem seminis nocturnam esse passum, quod quidem in tanta testiculorum integritate, et aetate non nimis prouecta vix credi posset, nisi ad hancce facti explicationem forsitan audaciorem confugeremus.

Tabula aenea vulneris sanati et cicatrice obtecti imaginem sistit. Litera A vrethrae orificium significat. In vtroque latere herniae antea commemoratae animaduertuntur, in dextro inguinalis externa, et cruralis, in sinistro cruralis: quarum prima, inguinalis, facillime quidem pro crurali haberi potest, attamen accurata peruestigatio rem aliter sese habere, me docuit. Ex longo enim temporis spatio hic vir bracherio male conformato minusque apto vtitur, quod retinet modo cruralem sinistram, hernias dextri lateris autem tantum abest, vt coerceat, vt cingulo eas deprimat, atque ad latus protrudat, quo magis promineant, totumque partium situm ita mutet, vt linea inter inguinalem et cruralem conspicua a ligamento POU-
PARTII propulso effingatur; linea superior acuta supra inguinalem in conspectum veniens non minus a bracherii impressione proficitur, et certissime credo, hanc inguinalem iam diu in scrotum descensurum fuisse, nisi partim depressione commemorata, partim vero cicatricis firmitate via ipsi praecluderetur.



